



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu
Tribunál Distritál Baucau

Dezemburu 2013

**Sumáriu prosesu julgamentu kazu iha Tribunál Distritál Baucau-
Periódú Dezemburu 2013**

Iha fulan Dezemburu 2013 JSMP hala'ó deit monitorizasaun iha semana primeíru no segundu tanba Tribunál Distritál Baucau mos tama iha loron ferias anual hanesan mos iha fatin sira seluk iha Timor Leste.

Iha fulan ne'e, JSMP konsege monitoriza kazu hamutuk 13, kompostu husi kazu krime 12 no kazu sivíl hamutuk 1.

Kazu krime hirak ne'e mak inklui maustratus ba kónjuje 1, ofensa ba integridade fízika simples ho natureza violénsia doméstika 10, krime ameasa, danu simples, no violasaun ba domisíliu 1 no kazu sivíl 1 ne'e mak kona-ba disputa rai.

Husi kazu 13 ne'e, iha kazu hamutuk 5 mak tribunál kondena ho pena multa, kazu 7 tribunál konklui ho pena prizaun maibe suspendidu no kazu 1 sei kontinua prosesu.

Tuir mai deskrisaun sumariu julgamentu kompleitu:

1. Kazu krime maus tratus ba kónjuje - Nú. Prosesu: 44 /Crm.C/2013/TDB

Kompozisaun tribunál	: Koletivu
Juis	: Dr. Afonso Carmona (representa juís koletivu)
Ministériu Públiku	: Dr. Baltazar Ramos (Prokurador internasionál)
Defeza	: Dr. José Grigório de Lima
Konkluzau	: Kondena pena prizaun tinan 2 fulan 2 suspende tinan 2 fulan 2

Iha 03 Dezemburu 2013, Tribunál Distritál Baucau prezide leitura akordaun ba arguidu LS ne'ebé komete krime maus tratus hasoru nia konjuje iha 18 Marsu 2012, iha Lautem- Lospalos.

Tribunál prova katak arguidu komete duni krime maus tratus hasoru vítima ho meus uza ai baku vítima iha parte ulun dala ida no iha liman fuan parte karuk dala ida.

Kazu ne'e akontese tanba vítima bandu arguidu ho nia kolega sira hemu tua iha sira nia uma. Tribunál konklui hodi kondena arguidu ho pena prizaun tinan 2 fulan 2 suspende ba tinan 2 fulan 2, no selu kustas judisiál \$ 20.00.

2. Kazu krime ofensa ba integridade fízika simples - Nú. Prosesu: 117/Crm.S/2013/TDB

Kompozisaun tribunál : Singulár
Juis : Dr. José Gonçalves
Ministériu Públiku : Dr. Aderito Tilman
Defeza : Dr. Jose Grigório de Lima
Konkluzau : Kondena ho pena multa \$ 45.00

Iha 03 Dezembru 2013, Tribunál Distritál Baucau prezide julgamentu hasoru arguidu AC ne'ebé involve krime ofensa ba integridade fízika simples ho natureza violénsia doméstika hasoru vítima RS nudar nia feen. Kazu ne'e akontese iha 06 Janeiru 2012 iha Manatuto.

Iha akuzasaun husi Ministériu Públiku haktuir katak iha loron 06 Janeiru 2012, tuku 17.00 lorokraik, depoisde arguidu ho vítima fila husi toos, too iha uma sira diskute malu kona-ba servisu ne'ebé sira nain rua halo durante loron 1. Tanba diskuti malu arguidu nervoujo hodi tuku dala barak iha vítima nia oin parte karuk, kotuk laran too rejulta vítima monu ba iha rai. Aktu ne'e rezulta vítima sofre moras no bubu iha parte oin no kotuk laran.

Ministériu Públiku akuza arguidu kontra artigu 145 Kódigu Penal kona-ba krime ofensa ba integridade fízika simpes konjuga ho artigu 35 Lei Kontra Violénsia Doméstika.

Iha deklarasaun arguidu nia konfesa katak faktus ne'ebé Ministeriu Públiku akuza los hotu. Arguido arepende ba nia hahalok no deklarata katak ba futuru sei la halo tan hahalok refere hasoru vítima no ba ema seluk. Tanbá arguidu konfesa faktus nune'é tribunál bazeia ba artigu 268 alinea 4 KPP presindi vítima no kontinua ba alegasaun orál.

Iha alegasaun finál, Ministériu Públiku husu ba tribunál atu aplika pena prizaun fulan 2 no suspende ba fulan 5 tanba arguidu konfesa faktus verdade no arepende ba nia hahalok.

Defeza mós iha nia alegasaun husu ba tribunál atu aplika pena adekuaudu ba arguidu tanba arguidu konfesa no arepende nia hahalok no too agora sira diak malu ona.

Tribunál konklui prosesu ba kazu ne'e iha 11 Dezembru 2013 no kondena arguidu ho pena multa US\$ 45,00.

3. Kazu krime ofensa ba integridade fízika simples - Nú. Prosesu: 224/Crm.S/2013/TDB

Kompozisaun tribunál : Singulár
Juis : Dr. Afonso Carmona
Ministériu Públiku : Dr. Aderito Tilman
Defeza : Dr. Juvinal Yanes Freitas (estajiadu)
Konkluzau : Kondena pena multa \$ 60,00

Iha 04 Dezembru 2013, Tribunál Distritál Baucau julga kazu krime ofensa ba integridade fízika simples ho natureza violénsia doméstika ne'ebé involve arguidu LM hasoru nia feen. Kazu ne'e akontese iha 06 Feveireiru 2012 iha Tatilari, Matahoi, Uatulari, Viqueque.

Iha akuzasaun ne'e haktuir katak iha 06 Feveireiru 2012 tuku 17.00 lorokraik, akontese diskuti malu entre arguidu ho vítima kona ba osan \$ 500.00 ne'ebé arguidu fo ba vítima rai maibé vítima uza tiha sein koñesementu arguidu nian. Iha diskuti malu ne'e, vítima sai ba Estrada no hakilar makaas nune'é halo arguido nervouju hodi tebe dala ida iha vítima nia hirus matan no vítima monu kedas ba rai. Aktu ne'e rezulta vítima sofre moras iha parte hirus matan.

Ministériu Públiku akuza arguidu konta artigu 145 Kódigu Penál kona-na ofensa ba integridade fízika simples konjuga ho artigu 35 Lei Kontra Violénsia Doméstika.

Arguidu konfesa faktus no totalmente rekuñese akuzasaun husi Ministériu Públiku. Arguidu mós arepende nia hahalok no deklara katak ba futuru sei la halo tan hahalok refere hasosu lezada.

Ministériu Públiku iha nia alegasaun finál husu ba tribunál atu aplika pena prizaun fulan 3 no susupende ba fulan 5 tanbá arguidu konfesa faktus no arepende ba nia hahalok.

Defeza mós husu ba tribunál atu aplika pena adekuaudu tanba arguidu hatudu nia komportamentu diak no parte rua moris hamutuk ho dame. Aleinde ne'e arguidu rasik mak responsabiliza ba familia.

Iha julgamentu ne'e tribunál prova katak arguidu provadu tebe dala ida iha vítima nia hirus matan hodi rejulta vítima monu ba rai. Iha tribunál arguido mós arepende ba nia hahalok nune'é Tribunál konklui nia desizaun pena multa hanesan temi iha leten.

Tribunál konklui prosesu ne'e iha 12 Dezembru 2013, no kondena arguidu ho pena multa \$ 60,00 no pena alternativu ba loron 80 se arguidu la kumpri pena multa ne'ebé artibui ba nia. Aleinde ne'e tribunál kondena mós arguidu selu kustus judisial \$ 10,00.

4. Kazu krime ofensa ba integridade fízika simples - Nú. Prosesu: 230/Crm.S/2013/TDB

Kompozisaun tribunál	: Singulár
Juis	: Dr. Afonso Carmona
Ministériu Públiku	: Dr. Baltazar Ramos (Prokurador internasionál)
Defeza	: Dr. Jonas Henrique da Costa (estajiadu)
Konkluzau	: Kondena ho pena multa \$ 75,00

Iha 04 Dezembru 2013, Tribunál Distritál Baucau julga kazu krime ofensa ba integridade fízika simples ho natureza violénsia doméstika ne'ebé involve arguidu ASP hasoru nia feen. Kazu ne'e akontese iha 03 Feveireiru 2013, iha Distritu Viqueque.

Ministériu Públiku katak haktuir katak iha 03 Feveireiru 2013, tuku 10.00 dader, arguidu ho vítima dsikuti malu tanba vítima deskunfia arguidu iha relasaun amante ho fetu seluk. Tanba diskuti malu no vítima koalia la para, nune'é arguidu nervouju no tebe dala rua iha vítima nia kidan karuk. Arguidu nia hahalok ne'e kauza lezada sofre moras iha parte kidan karuk.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simpes konjuga ho artigu 35 Lei Kontra Violénsia Doméstika.

Arguidu konfesa faktus no totalmente rekuñese akuzasaun Ministériu Públiku nomos deklarata katak loron ida depois problema ne'e sira rejolve liu husi kustume. Arguidu arepende ba nia hahalok no deklarata katak ba futuru sei la halo tan hahalok refere hasoru vítima. Tanbá arguidu konfesa faktus tribunál presinde vítima tuir artigu 268 KPP alinea 4.

Iha alegasaun finál, Ministériu Públiku husu ba tribunál atu aplika pena prizaun fulan 3 se karik tribunál iha hanoin seluk bele aplika troka pena multa kada loron arguidu multa \$.1.00 durante fulan 3.

Defeza mós iha nia alegasaun husu ba tribunál atu aplika pena adekuaudu tanba arguidu hatudu nia komportamentu diak, moris hamutuk ho dame no arguido mak responsavel ba nia familia uma laran.

Tribunál konklui prosesu ne'e iha 12 Dezembru 2013, no kondena arguidu ho pena multa \$ 75.00, se karik arguidu la selu maka arguidu tenki kumpri pena alternativu iha prizaun durante loron 100. Aleinde ne'e tribunál mós aplika kustu judisial \$10.00.

5. Kazu krime ofensa ba integridade fízika simpes - Nú. Prosesu; 59/Crm.S/2013/TDB

Kompozisaun tribunál	: Singulár
Juís	: Dr. Hugo da Costa Pui (estajiadu)
Ministériu Públiku	: Dr. Baltazar Ramos (Prokurador internasionál)
Defeza	: Dr. Juvinal Yanes Freitas (estajiadu)
Konkluzau	: Kondena pena multa \$ 120,00

Iha 10 Dezembru 2013, Tribunál Distritál Baucau prezide leitura sentensa ba kazu ofensa ba integridade fízika simpes ho natureza violénsia doméstika ne'ebé involve arguidu ERS hasoru nia feen. Kazu ne'e akontese iha 17 Outboru 2013 iha Distritu Viqueque.

Tribunál prova katak arguidu dada duni vítima too monu ba rai, rasta vítima ba kuartu laran no tebe dala ida iha vítima nia kanotak hanesan akuzasaun Ministériu Públiku.

Iha ikus tribunál kondena arguidu ho pena multa \$ 120.00 (kada loron \$ 1,00 durante loron 120), pena alternativu loron 80 kumpri iha prizaun se karik arguidu la selu multa. Aleinde ne'e tribunál aplika arguidu selu kustas judicial \$ 20.00.

6. Kazu krime ofensa ba integridade fízika simples - Nú.Prosesu: 161/Crm.S/2013/TDB

Kompozisaun tribunál : Singulár
Juís : Dr. Afonso Carmona
Ministériu Públiku : Dr. Baltazar Ramos (Prokurador internasionál)
Defeza : Dr. Juvinal Yanes Freitas (estajiadu)
Konkluzau : Kondena tinan 1 prizaun suspende ba tinan 1 fulan 6

Iha 11 Dezembru 2013, Tribunál Distritál Baucau prezide leitura sentensa ba krime ofensa ba integridade fízika simples ho natureza violénsia doméstika ne'ebé invove arguidu JG hasoru nia vítima AG nu'udar nia aman. Kazu ne'e akontese iha 01 Abril 2013 iha Distritu Viqueque.

Tribunál prova katak arguidu tebe dala ida iha vítima nia ulun. Kazu ne'e akontese ho motivu tanba arguidu nervuajo ho vítima ne'ebé bandu arguidu nia alin feto fase arguidu roupa.

Mesmu nune'e, tribunál mos konsidera sirkunstansia atenuantes hanesan arguidu konfesa verdade ba tribunál, arepende ninia hahalok, nune'é tribunál konklui hodi kondena arguidu ho pena prizaun tinan ida suspende ba tinan ida fulan neen.

Ba kazu ida ne'e Ministériu Públiku akuza arguidu komete krime ofensa ba integridade fízika simples ho natureza violénsia doméstika ne'ebé preve iha artigu 145 Kódigu Penál.

7. Kazu ofensa ba integridade fízika simples - Nú. Prosesu: 130/Crm.S/2013/TDB

Kompozisaun tribunál : Singulár
Juís : Dr. Afonso Carmona
Ministériu Públiku : Dr. Baltazar Ramos (Prokurador internasionál)
Defeza : Dr. Juvinal Yanes Freitas(estajiadu)
Konkluzau : Kondena tinan 1 prizaun suspende ba tinan 1 fulan 2

Iha 11 Dezembru 2013 Tribunál Distritál Baucau prezide leitura sentensa ba krimi ofensa ba integridade fízika simples ho natureza violénsia doméstika ne'ebé invove arguidu MC hasoru nia feen . Kazu ne'e akontese iha 21 Janeiro 2013, iha Distritu Viqueque.

Ministériu Públiku akuza arguidu komete krime ofensa ba integridade fízika simples ne'ebé previstu iha artigu 145 Kódigu Penál konjugadu ho artigu 35 Lei Kontra Violénsia Doméstika. Kazu ne'e akontese tanba motivu diskuti malu kona-ba hahan iha uma laiha hodi nune'é arguidu nervouju basa dala 1 no tuku iha vítima nia kotuk laran.

Iha julgamentu ne'e tribunál prova katak arguidu basa dala ida no soku vítima iha nia kotuk laran. Tribunál mós konsidera sirkunstansia atenuante sira hanesan arguidu arepende nia hahalok tanba ne'e, tribunál kondena arguidu ho pena prizaun tinan 1 suspende ba tinan 1 fulan 2.

8. Kazu krime ofensa ba integridade física simples- Nú. Prosesu; 77/Crm.S/2013/TDB

Kompozisaun tribunál: Singulár

Juis : Dr. Hugo da Cruz Pui (estajiadu)
Ministériu Públiku : Dr. Aderito Tilman
Defeza : Dr. Juvinal Yanes Freitas (etajiadu)
Konkluzau : Kondena pena multa \$ 90,00

Iha 11 Dezembru 2013, Tribunál Distritál Baucau prezide leitura sentensa ba kazu ofensa ba integridade física simples ho natureza violénsia doméstika ne'ebé invove arguidu DESA hasoru lezada LJ. Kazu ne'e akontese iha 01 Jullu 2013, iha Distritu Viqueque.

Tribunál prova katak arguidu foti ai baku dala rua iha vítima nia isin lolon. Kazu ne'e akontese tanba vítima la aseita arguidu kous sira oan tanba arguidu iha kondisaun lanu.

Mesmu nune'e, tribunál konsidera katak hatudu nia arependimentu, nune'e tribunál kondena arguidu ho pena multa \$ 90,00 no pena alternativu loron 60 kumpri iha prizaun se arguidu la selu multa.

Antes ne'e Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 Lei Kontra Violénsia Doméstika.

9. Kazu krime ameasa, danu simples no violasaun ba domisliu - Nú. Prosesu: 260/Crm.S/2013/TDB

Kompozisaun tribunál : Singulár
Juís : Dr. Afonso Carmona
Ministériu Públiku : Dr. Baltazar Ramos (Prokurador internasionál)
Defeza : Dr. Jonas Henrique da Costa (estajiadu)
Konkluzau : Kondena tinan 1 fulan 2 prizaun suspende tinan 2

Iha 11 Dezembru 2013, Tribunál Distritál Baucau prezide julgamentu ba kazu krime ameasa, danu no violasaun ba domisliu ne'ebé invove arguidu BC. Arguidu komete krime hirak ne'e hasoru vítima sira ho inisiál ZC, DC, no AGS ne'ebéakontese iha 17 Agostu 2009, iha Distritu Baucau.

Ministériu Públiku akuza katak iha 17 Feveireiru 2013, tuku 20:00 kalan, arguidu ba iha vítima sira nia uma ho katana taa air rin eletresidade, taa vítima nia semente iha veranda uma oin, no tama ba iha uma laran buka vítima nia laen atu oho. Arguidu la konsege hetan vítima nia laen

(AGS) no vítima nia banin mane (DC) tanba sira na'in rua subar metin. Arguidu ameara vítima ho liafuan "*aban sei mai fali taa kotu imi na'in 3 nia kakorok*". Aleinde ne'e arguidu taa rahun vítima nia oan nia manta.

Ministériu Públiku akuza arguidu kontra artigu 157 Kódigu Penál kona-ba krime ameara, artigu 258 Kódigu Penál kona-ba danu simples no 185 Kódigu Penal kona-ba violasaun ba domisíliu.

Iha prosesu julgamentu, arguidu deklara katak iha momentu ne'ebá nia ba iha vítima nia uma tanba nervoujo hare ema nain tolu kaer hela sasan kroat hanesan dima, katana.

Testamuña ba kazu ne'e ho inisial RF depoimentu katak nia rona besi lian makas, rona mós arguidu hakilar ho liafuan ameara hanesan temi iha akusazaun. Aleinde ne'e nia hare ho mata arguidu taa simenti iha vítima nia varanda.

Iha alegasaun finál, Ministériu Públiku husu ba tribunál atu aplika pena prizaun tinan 1 fulan 6 no suspende ba tinan 3. Defeza husu ba tribunál atu aplika pena adekuadu.

Tribunál konklui kazu ne'e iha 13 Dezembru 2013 no tribunál kondena arguidu ho pena prizaun tinan 1 fulan 2 suspende ba tinan 2.

10. Kazu krime ofensa ba integridade fízika simples - Nú. Prosesu 210/Crm.S/2013/TDB

Kompozisaun tribunál	: Singular
Juis	: Dr. Afonso Carmona
Ministériu Públiku	: Dr. Baltazar Ramos (Prokurador internasionál)
Defeza	: Dr. Juvinal Yanes Freitas (estajiadu)
Konkluzau	: Kondena tinan 1 prizaun suspende ba tinan 1 fulan 2

Iha 11 Dezembru 2013 Tribunál Distritál Baucau prezide leitura sentensa ba ofensa ba integridade fízika simples ho natureza violansia domestika ne'ebé involve arguidu MF hasoru nia feen. Kazu ne'e akontese iha 03 Maiu 2013 iha Distritu Baucau.

Tribunál prova katak arguidu iha momentu ne'ebá iha kondisaun lanu baku vítima iha parte liman fuan dala ida, no kotuk laran. Kazu ne'e akontese tanba motivu vítima hasé ka haruka arguidu atu la bele hemu tua barak.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 35 Lei Kontra Violénsia Doméstika.

Bazei ba faktu sira ne'ebé produz tribunál konklui hodi kondena ho pena prizaun tinan 1 suspende ba tinan 1 fulan 2.

11. Kazu krime ofensa ba integridade fízika simples - Nú. Prosesu: 134/Crm.S/2013/TDB

Kompozisaun tribunál : Singulár
Juis : Dr. Afonso Carmona
Ministériu Públiku : Dr. Baltazar Ramos (Prokurador internasionál)
Defeza : Dr. Jonas Henrique da Costa (estajiadu)
Konkluzau : Kondena pena prizaun tinan 1 suspende ba tinan 1 fulan 6

Iha 11 Dezembru 2013, Tribunál Distritál Baucau julga kazu krime ofensa ba integridade fízika simples ho natureza violensia domestika ne'ebe involve MM hasoru vítima NN. Kazu ne'e akontese iha 25 Agostu 2013, iha Distritu Manatuto.

Tribunál prova katak arguidu komete krime ofensa ba integridade fízika simples hasoru vítima. Maibe iha tribunál nia oin, arguidu hatudu nia arependementu ba nia hahalok.

Tribunál konklui nia desizaun hodi kondena arguidu ho pena prizaun tinan 1, suspende ba tinan 1 fulan 6 no selu kustus tribunál \$10.00.

Antes ne'e Ministériu Públiku akuza arguidu kontra artigu 145 Kódigu Prosesu Penal konjugadu ho artigu 35 Lei Kontra Violénsia Doméstika.

12. Kazu krime ofensa ba integridade fízika simples - Nú. 212/Crm.S/2013/TDB

Kompozisaun tribunál : Singulár
Juis : Dr. Afonso Carmona
Ministériu Públiku : Dr. Aderito Tilman
Defeza : Dr. Miguel Amaral
Konkluzau : Kondena fulan 10 prizaun suspende ba tinan 1

Iha 12 Dezembru 2013, Tribunál Distritál Baucau julga kazu krime ofensa ba integridade fízika simples ho natureza violénsia doméstika ne'ebé komete husi arguidu AAA hasoru nia feen. Kazu ne'e akontese iha 31 Jullu 2013, iha Distritu Baucau.

Tribunál prova katak arguidu baku vítima iha parte inus too ran sai. Tribunál mos konsidera katak arguidu arepende ninia hahalok. Tanba ne'e Tribunál konklui hodi kondena arguidu ho pena prizaun fulan 10 suspende ba tinan 1. Kazu ne'e akontese tanba tanba sira oan tanis no vítima lakohi kous sira oan ne'ebé tanis hela.

Antes ne'e Ministériu Públiku akuza arguidu kontra artigu 145 Kódigu Penal kona-ba ofensa ba integridade fízika simples konjugadu ho artigu 35 Lei Kontra Violénsia Doméstika.

13. Kazu disputa rai - Nú. Prosesu:43/Civ.PC/2013/TDB

Kompozisaun tribunál : Singulár

Juis : Dr. Afonso Carmona
Defeza (autór) : Dr. Lino Lopes
Defeza (reu) : Dr. Jose Grigório Delima
Konkluzau : Prosesu kontinua

Iha 13 Dezembru 2013, Tribunál Distritál Baucau julga kazu sivíl ho tipu disputa rai. Autór ba kazu ida ne'e inisiál GS hasoru Reu ho inisiál AS. Kazu ne'e akontese iha 19 Setembru 2013 iha Distritu Baucau.

Iha prosesu julgamentu ne'e tribunál rona depoimentus husi testemuña na'in 2 husi parte rua. Testemuña ho inisiál SS husi parte autór depoimentu katak rai disputa partensia ba autór tanba hetan eransa husi autór nia avo sira inklui eransa mós ba testemuña. Iha kintal laran ne'e ka rai disputa ne'e, autór nia avo sira kuda ona ai horis desde tempu naruk, hanesan ai kamí, tali metan, sabraka, no nú.

Testemuña haktuir parte autór hanesan be oan hela iha rai refere no kontinua utiliza rai ne'e too agora. Testemuña ne'e hato'ó katak nia senti hakfodak tanba derepente reu ho nia familia harí kuluna uma permanente iha rai refere.

Testemuña ho inisiál JX husi parte Reu depoimentu katak nia hanesan badaen mak halo uma iha rai disputa ne'e ho medida *6 x 12 meter*. Tuir testemuña ne'e katak reu sira hela iha rai disputa ne'e desde tinan 1979.

Depois rona depoimentus husi testemuña sira, tribunál fo tempu ba parte rua nia advogadu hodi halo alegasaun finál.

Defeza husi autór alega katak bazeia ba artigu 334 Kódigu Prosesu Sivíl husu ba tribunál atu hapara totalmente kontrusaun iha rai disputa tanba problema hadau malu rai ne'e konsege rejolve ona iha nivel iha uma kain, aldeia, suco no subdistritu no rejultadu katak rai tugu-isi (naran husi rai disputa) ka rai disputa entrega totalmente ba autór. Maibe iha tempu ne'eba parte reu la simu iha prosesu nivel 4 ne'e.

Iha parte seluk, defeza husi reu alega katak rai disputa refere la'os partensia ba autór maibe partensia ba FP no AP. Reu halo uma ne'e iha koñesimentu ba rai na'in FP no AP. Tanba reu sira hela kleur ona iha rai refere, tanba ne'e defeza husu atu la bele hapara atividades husi reu.

Depois rona tiha alegasaun husi parte sira, tribunál marka julgamentu iha 18 Dezembru 2013, tuku 14.00 lorokraik.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone:3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPTl